

Enfoke ariba derecho di mucha y trafico di persona den Conferencia di Reino



ORANJESTAD — Topiconan cu lo bay wordo trata awe durante Conferencia di Reino lo bay ta entre otro derechonan di mucha, cooperacion na nivel economico y cohesion den Reino. Ademas lo bay check con a para cu e gruponan di trabou di entre otro trafico di persona den Reino, pa loke ta topico ey, Hulanda ya caba a duna di conoce cu ta bay tin cambio. Den antesala di e conferencia di awe, e reunionnan na nivel administrativo a tuma luga ayera. Prome cu esey caba un asina yama regiegroep a reuni via video conferencing ariba e agenda di e reunion y asuntonan di logistica. Awe mainta na Radisson Hotel e apertura oficial ta tuma luga y e conferencia ta sigui te 5'or di atardi, na unda lo bay tin un momento cu prensa. Den un carta recien pa Tweede Kamer, minister di Asuntonan Interior y di Relacionnan den Reino Ronald Plasterk a splica kico lo bay ta cierto topiconan cu lo bay wordo discuti awe hunto cu prome ministernan Eman, Asjes di Corsou y Wescott-Williams di St. Maarten. Ariba iniciativa di prome minister Eman cada pais por a entrega topiconan pa e agenda. Aruba a bin cu dos topico. E prome ta encera con por trece mas cohesion y identificacion cu otro den Reino. E otro ta fo-



cus ariba e cantidad di factornan cu ta stroba asina yama Small Island developing States (SIDS) manera Aruba, Corsou y St. Maarten pa yega na por ehempel mas sostenibilidad y ta haci tipo di paisnan aki vulnerabel. Plasterk den su carta no a haci mencion di e puntonan di agenda cu Corsou y St. Maarten a contribui, pero si a indica cu Hulanda

lo kier pone enfoke grandi ariba derechonan di mucha. Esaki ta basa ariba e rapport di Unicef cu a sali aña pasa cual tabatin cierto puntonan di critica ariba situacion di derechonan di mucha ariba e tres paisnan Caribeense di Reino. E otro topico ta cooperacion economico. Plasterk no tabata mucho cla ariba kico esaki lo encera, pero hecho

ta cu durante e asina yama Koninkrijksberaad entre Aruba, Hulanda y Corsou cu a tuma luga aña pasa, e minister di Relacionnan di reino ya caba a duna di conoce cu Hulanda lo kier mira Aruba y Corsou traha hunto ariba tereno di forma un hub entre Europa y Latino-America, algo cu ambos pais tin ambicion pe.

Gruponan di trabou

Fuera di e topiconan aki, e paisnan ta bay wak hunto kico e cuater gruponan di trabou cu a wordo forma durante ultimo Conferencia di Reino na 2011. Plasterk ta bisa den su carta na Tweede Kamer cu e cuater gruponan di trabou aki a cuminsa nan trabou un tiki slow, pero a cuminsa traha dura na dado momento, reuniendo via video conferencing. E cuater gruponan di trabou aki tabata trata e topiconan cooperacion, problemanan practico ariba tereno di Statuut y tambe su interpretacion, disputa legal y e famoso batata cayente di trafico liber entre e paisnan den Reino. Pa loke ta esey, Plasterk recientemente a declara na Caribisch Netwerk cu pa cu esaki con cu bay bin, gabinete actual na Hulanda kier mira pa trafico di personanan entre e paisnan den reino lo bay tin cierto condicionnan.

Protesta

Ayera minister Plasterk hunto cu prome minister Eman a bishita e edificio di Rietveld Academie den Wilhelminastraat - cual por cierto te ainda no a conoce su apertura oficial -. Prome cu esey el a bishita Gobernador Fredis Refunjol. Dilanti oficina di Gobernador, Plasterk a topa un grupo di demostrante cu pancartanan mencionando entre otro cu no tin scol nobo pero si tin un tram, cu e asina yama Bosmanwet ta un forma di Apartheid (referiendo na e sistema di division racial cu pa decadanan tabata vigente na Sur-Afrika), y cu criminalidad ta na su nivel mas halto di tur tempo aki na Aruba. Segun fotografo di Bon Dia Aruba, Plasterk a para keto un rato, a papia cu e manifestantenan y a ricibi un carta di nan. Pa loke ta e grupo di manifestante mes, tabata trata di integrantenan di mesun grupo cu tambe a manifesta durante ultimo bishita di Pareha Real y a tene manifestacionnan contra gobierno diferente biaha den ultimo añanan, entre otro contra parke di molina na Urirama. Fraccion di MEP tambe tabata presente durante e manifestacion. Lider di partido Evelyn Wever-Croes a duna tambe su sosten na e iniciativa ariba su pagina di Facebook. □